

唐
文
拾
遺

唐文拾遺卷之二十二

榮祿大夫三品頂戴前分巡廣東高廉道加四級臣陸心源輯

賈至

全唐文三百六十六有傳

百家類例序

以其婚姻承家冠冕備盡則存譜大譜所紀者唯尊
官清職傳記本原分爲十卷爰列百氏其中須有部
折各於當族注之通爲百氏以隴西李氏爲第一
要三
十六

王縉

全唐文三百七十有傳

大臣入朝見百寮奏

春秋之義臣子一例今後有大臣入朝百寮望請朝罷于中書行相見之禮其宴餞准故事于鴻臚亭集

唐會要
二十四

劉晏

全唐文三百七十有傳

懇讓吏部尚書表

伏以天官之職師在冢卿任當選仕之權班居諸曹之首至密者可以啟事至明者可以論材內者無能

何堪就列且轉輸之務國家之常千倉萬庾陛下之
粟也槁工櫟師陛下之人也縱萬億及秭達于京師
邦賦獲殷軍儲克贍此亦常理于臣何功况受任以
來淹引歲月減耗頗有委積非多經費所支尙貽聖
慮在臣之責實亦難逃夙夜惕厲不遑啟處豈敢取
眾人之力以爲己勞守臣下之分因而受遺速其官
謗紊以朝經願迴震光乞寢前命

冊府四百
六十四

檢點祭器奏

諸色祠祭委禮儀使撰禮料爲常式祭前點檢祭器
及饌物明衣有不在者所由量事料決其行事官若

出齋官及不到明衣及料不得妄

唐會要
二十三

包估

全唐文三百七十有傳

請詳定開元時令奏

開元刪定禮記月令爲時令其旨及義疏並未刊正

其開元禮所與月令相涉者請選通儒詳定

唐會要
七十七

明立私錢賞罰奏

江淮百姓近日市肆交易錢交下粗惡揀擇納官者
三分纔有二分餘並鉛錫銅盪不數斤兩致使絹價
騰貴惡錢漸多訪聞諸州山野地窖皆有私錢轉相

貨易奸濫漸深今委本道觀察使明立賞罰切加禁

斷唐會要
八十九

社稷改用太牢奏

春祭社稷准禮天子社稷皆太牢至大厯六年十月

三日勅中祀少牢社稷是中祀至今未改唐會要
二十二

劉秩

全唐文三百七十二有傳

政典

我皇帝思侔前古永傳後裔下無山甫將明之才乃
聽百藥偏昧之說從羣臣之小議挫爲國之大經設

爵無上署官不職王澤不布人無承化遂令刑辟未
弭國用不殷權柄擅于后氏社稷絕而復存揆久安
之由在于取順而難爲逆絕欲奪之原在于單弱而
無所憚此卽事之明驗也百藥不詳秦漢晉宋齊隋
得失之異謂不足法復忽滄于賈曹劉陸成敗之說
妄之天命天之所命人事而已棄人事捨天理滅聖
智任存亡也故建侯者所以正冢嫡安父子之分使
不相猜貳豈藩屏王室已哉夫先王之尙封建也非
止貴於永久貴其從化而省刑故郡建則督責督責
則刑生國開則明教明教則從化從化之行因於封

建封建則諸侯之制與天子備同備同而禮殺禮殺
然後可宣教化宣教化則仁義長仁義長則尊卑別
尊卑別則禍亂息此封建之所以易爲理也郡縣之
理可以小寧不可以久安可以責成不可以化俗鳴
呼上無堯舜猶可也有堯舜之德欲廣其澤捨此何
以哉自漢以降雖封建失道然諸侯猶皆就國今封
建子弟有其名號而無其國邑空樹官僚而無蒞事
聚居京輦食租衣稅國用所以不足也

唐會要
四十七

李批

全唐文三百七十三有傳

選人自覓保識官奏

宗子諸親齋郎室長選人準格每年遣諸陵廟丞等充保識官今請選人自于諸司求覓清資及在任宗子京官充保識以憑給解伏乞編入吏部選格以爲久例

唐會要六十五

柳渾

全唐文三百七十七有傳

請改名奏

頃爲狂賊點穢臣實恥稱舊名矧字或帶戎時當偃

武請改名渾

南部新書

李泌

全唐文三百七十八有傳

學士去大字疏

伏蒙以臣爲集賢殿大學士竊尋故事中書令張說
中朝元老碩德鴻儒懇辭大字眾稱達禮其後至德
二載崔圓爲相加集賢殿大學士其後因循遂成恆
例伏望削去大字崇文館大學士亦準此

唐會要
六十四

歸崇敬

全唐文三百七十九有傳

上丁釋奠講論奏

上丁釋奠其日準舊例合集朝官講論五經文義自大厯五年以前常行不絕其年八月以後權停講論今旣日逼恐須復依舊奏

唐會要三十五

請罷袴褶奏

按三代典禮兩漢史籍並無袴褶之制亦未詳所起之由隋代以來始有服者事不師古請罷之

唐會要二十四

御署祝版奏

每年春秋二時釋奠祝版御署訖北面而揖臣以爲其禮太重按大戴禮師尙父授周武王丹書武王東面受之請參酌輕重庶得其宜

唐會要三十五

嚴武

武字季鷹房琯薦爲執事中坐琯事貶巴州刺史久之擢劔南節度加檢校吏部尙書年四十卒

御史給公乘奏

應在外新除御史赴臺停止店肆事亦非宜仍令所在給公乘發遣以爲永例

冊府

巴州古佛龕記

巴州城南二里有古佛龕一所右山南西道度支判官衛尉少卿兼侍御史內供奉嚴武奏臣頃牧巴州其州南二里有前件古佛龕一所舊石壁鐫刻五百

餘鋪劃開諸龕化出眾像前佛後佛大身小身珠磨
至堅彫飾甚妙屬歲月綿遠儀形虧缺乃掃拂苔蘚
披除榛蕪仰如來之容爰依鷲嶺所聖上之福新作
龍宮精思竭誠崇因樹果建造屋宇叁拾餘間并移
洪鍾壹口莊嚴福地增益勝緣焚香無時與國風而
蕩穢然燈不夜助皇明以燭幽曾未經營自然成就
臣幸承恩宥馳赴闕庭辭日奏陳許令置額伏望特
旌裔土俯錫嘉名降以紫泥遠被雲雷之澤題諸紺
宇長懸日月之光兼請度無色役有道行者漆僧永
以住持俾其修習勅旨其寺宜以光福爲名餘依乾

元三年四月十三日

金石苑

韓濟

濟乾元中大理評事巴州長史

唐救苦觀世音菩薩像銘

茲救苦觀世音菩薩像者巴州刺史嚴武奉報烈考
中書侍郎遠日之所鑿也乾元二年正月十三日大
理評事兼巴州長史韓濟銘曰

於錄使君孝心不忘□□菩薩靈相克彰昊天永永
思報無量□□崑崙庶乎有常

石刻

崔巨

巨字爲式大厯中右補闕殿中侍御史

大唐宣州刺史薛公碑

按新安志九及寶刻叢編十五引復齋碑錄

皆作崔巨撰文見全文闕名今存其目

獨孤及

全唐文三百八十四有傳

鄭駙馬孝行記

特進駙馬都尉滎陽鄭潛曜字某

五字其華作鄭
潛曜其字 睿

宗外孫元宗之甥代國長公主之才子也睿敏而文

生知純孝開元中長公主寢疾公年二十八觸燧侍

左右帶不解面不頤者累月嘗藥請禱憂懇備至而

疾無瘳乃刺血濡翰書爲策

英華作榮

祝請命于上下神

祇願以身代親之身乞靈祈死泣盡繼血旣而誠達

於神感而遂契徹筵俟命焚其章草

英華作畢

獨神道許

三字在乎

二字作存於

煨燼之中翌日長公主疾閒公固

命左右勿敢言於其請天之章公之客尹靈琛之辭

也向微靈琛言之則人莫知之者矣君子謂天道遠

人道邇其死生冥運吉凶陰陽未嘗與人

英華作天

同功

也而孝子竭誠上元爲感神符靈貺來若響答乃知

行或精至則幽明

英華作冥

不能逃其應而況人乎鄭氏

之行其事親也可謂孝矣惟武王周公與天合德三

壇之祝宜有不應若公者也

英華作地

在綺襦執袴之中

非有植璧秉珪之禮而精誠上之神亦降福非德性

純至其孰能致感如此其速者歟公開元二十八年

尙元宗第十二女臨晉長公主公主柔明而賢輔佐

以禮公力行好學處貴不驕跋履夷險無替忠信歷

太僕光祿嗣榮陽郡公佩金印列長戟垂三十餘載

克荷大業而崇其家聲善而必慶爲不誣矣懼他日

史氏闕疑也故著之於篇

本集

田伏寶

伏寶恆州人

造象刻經記

弟子田伏寶爲先亡父兄見存母弟往爲門虧十善
不樹福緣姪巖殞命於同羅女子天辭於白日虔心
告佛罄志歸依敬就三門石柱刊阿彌陀佛蜜多心
經以乾元元年四月五日鑄鏤功畢桑海有改變遷
移經像固存乎不朽合家眷屬法界有緣同霑斯福

常山貞
石志

賈耽

全唐文三百九十四有傳

華夷圖玉山記

玉山與天際勢聯北斗又名玉斗山循山之麓升降
凡十有五里至大泮坂地寬曠約數百畝而奇峰秀
嶺恠石深池環列于前後左右真仙靈之窟宅也山
有龍潭一十八礫又有二十四奇曰玉瑯峰銀尖峰
七盤峰獅子峰石牛峰雲蓋峰蟠龍峰金雞墩洗墨
池望香墩九蓮池天門峰飛泉峰屏風峰誓坡石浴
佛池彩霞巖過雲洞連理木天聖松金剛嶺石鼓山
羅漢峰志初巖真一邑勝概之尤者也故縣亦由此

名山游記

劉太真

全唐文三百九十五有傳

諸道供紙張奏

準貞元元年八月二日勅當司權宜停減諸色糧外
紙數內停減四萬六千張續準去年八月十四日勅
寫經書令諸道供寫書功糧錢已有到日見欲就
功伏請於停減四萬六千張內却供麻紙及書狀藤
紙一萬張添寫經籍其紙寫書足日卽請停又當司
準格楷書八年試優今所補名皆不情願又準今年
正月十八日勅諸道供送當省寫經書及校勘五經

學士等糧食錢今緣名補楷書未得解書人元寫經
書其歷代史所有欠闕寫經書畢日餘錢請添寫史

書

唐會要
六十五

王璲

全唐文三百九十五有傳

唐故朝議郎行登州司馬上柱國王府君墓誌

銘 并序

公諱慶字弘慶東萊掖人漢議郎扶卽其先也崇勳
重爵允光前史休風茂範克被後昆祖相隨任齊州
錄事叅軍考選隨任濟州東阿縣令並容表魁傑機

神穎悟雖位不充量而行足場名公幼得奇童之目
早標正人之稱多才藝尙沖蘭隱不違親貞不絕俗
年甫弱冠河濟名流翕然已想望其風矣龍朔初刺
史河南邱孝忠褰襜海甸下車未幾便引公爲談客
時高麗餘孽作梗遼川詔徵舟師濟自黃腫邱君以
公有深謀遠算遂要在中權同郗超之入幕類田疇
之出塞閱賞酬庸拜上柱國軍罷勅授昭武校尉營
州都督府瀼河鎮將馬邑蕭條龍山阻絕肅恭王事
余病未能久之除雅州和州鎮將昔我先君嘗旋轡
於九折顧惟徽尙願摶閑於一邱是時太夫人在堂

有羸老之疾公孝性純懇興言飲淚衣不解帶藥必
親嘗居喪之禮哀毀過制萬歲通天元年白虜赧起
鋒交碣石青林失律火照甘泉天子詔左衛將軍薛
訥絕海長驅掩其巢穴飛翬輓粟霧集登萊監軍御
史范玄成與公素遊捐公清幹且以務藺得兼統押
乃密表馳奏朝廷許焉俄除朝議郎行登州司馬仍
充南運使恩命光臨飭躬就列情勤悅使義薦均勞
紅粟齊山飛雲蔽海三軍歎口僉曰得人聖曆年運
停還任公雅愛虛寂林壑之致始終不渝雖歸塵滿
庭常嘯詠無輟昔桓溫每云我方外司馬豈斯之謂

歟何圖天屬不戒奄從化往春六十七以神龍元年十一月二日卒於官舍嗚呼哀哉夫人同郡呂氏劔履舊族言容夙備作配君子宜其室家而與善徒欺未秋先落粵開元九載龍集辛酉十一月甲辰朔六日己酉昭旼靈殯合葬於披城東南五里岡披山之陰禮也嗣子瀛州司戶叅軍璲處孝出忠自家形國啼枯柏樹思結寒泉勒豐石於夜臺播餘芬於永世

銘曰

偉哉華胄世濟賢秀猗歟若人不忝其舊幼有令名長□宦情飛談入幕堅臥辭榮始乃事親終惟報國

方舟轉饒遼水無極展驥來旋仁風允塞雅懷未愜
痼疾彌留荒涼池館零落山邱劒埋同匣樹聳行楸

蒼蒼日暮煙鳥空愁

石刻

臧希晏

希晏寶應初左金吾將軍

街鼓臧常式奏

諸街鋪鼓比來依漏刻發聲從朝堂發遠處每至夜
纔到伏望今日已後臧常式一刻發聲庶絕違犯

唐會

要七十一

王淑

淑乾元中右金吾長史

醫術請同明法奏

醫術請同明法選人自今已後各試醫經方術策十道本草二道脈經二道素問十道張仲景傷寒論二道諸雜經方義二道通七以上留已下放又尙食藥藏局請同典膳局太醫署請同大樂署

唐會要八十二

胡詹

詹永泰中幽州節度判官兼掌書記朝議大夫行監

察御史

按新順天府志作明詹

大唐故高士滎陽鄭府君之碣

府君諱忠字惟忠滎陽人也其先出自周宣王母弟

友受封於鄭

字缺六

爲

字缺六

代爲韓□侯後以國命氏

枌榆甲族繼美滎陽閥閥名賢散居天下七代祖覽

河間太守封鄭亭侯生幽州錄事參軍昌昌生高祖

武清令羅漢屬隨室土崩豪傑雲起有若竇建德者

聚兵稱亂圍逼武清時獨堅守孤城確固臣節□神

堯踐祚壯之加右衛大將軍宰縣如故進封永年公

食邑一千戶茲邑建功之地子孫克守勳業至今家

焉生曾祖諱贊贊生□祖諱□志俱以儒術著聞頻

徵有道不起生皇考諱承

楊公

問罪東夷請於幕府以豹畧謀於軍事及還恥受討
遼之功拂衣高蹈以例授陪戎副尉上護軍終不言
祿節也府君卽副尉之元子風概天資碩德山立長
材偉貌虬髯虎膺心游六經家口二事孝悌仁信禮
讓溫恭皆發於自然如竹箭之有筠也早勤色養不
願從仕中服儒行不沾於名晚固幽貞不趨於世是
以鄉黨三薦孝廉皆不之應其晦跡也恬然靜默其
偶俗也同爲滑和致身於木雁與物爲芻狗謂爲慕
隱不處於山林謂爲趨榮不親於朝市人徒識其貌
不測其心徒仰其高難師其行至於王霸大略馭人

體要守宰欽風諮謀政術者踵至於門矣他日嘗獨立謂其子希渤吾閭測天道靜觀人事九六之運莽卓之災將丁聖代爾當堅秉誠節勤修令名嗟吾道衰良恐不免居十數歲果安氏逆命竊據洛陽將欲崇式真賢輝光僞位以府君林廬潛蹈馨香遠聞姑欲繫維允塞人望迫令強起尉於長豐則知烏戾於天雲羅得之魚潛在泉川畧得之僞命逼於正人烏可脫也雖欲逃於天穴於泉其可得乎史氏繼亂抑授東光縣丞轉奉義郎左衛尉兵曹參軍上護軍旣睽宿心曾不視事拂衣解印請留幽都闔門靜居屏

弃塵事獨與一二道者遊息乎家園幽實琴壺倚傲
雲月進則□爲退能全高卷舒在懷語默兼遂君子
曰智哉以大盜未清沉憂成疾年五十七壬寅歲夏
四月乙亥傾背於挹樓里之私第冬十月聖上翦四
滑清三光凡拒凶徒特加超授議者以府君遇亂脅
從矢節無撓逢時旌善生涯不留悲夫故書曰高士
成府君之志也夫人彭城劉氏柔順以成孝貞正以
起家蕙心先□椒頌仍在丙申歲夏五月二十有七日先
府君而終享年五十有三嗣子希潮血毀長號骨立
過禮以今年十有一月庚申安神於武清縣西北崇

仁鄉白塔東北原合祔於先塋之左喪事尙儉奉遺
誠也夫聳曾峯者磐乎厚地漢洪流者發自深淵府
君德邁於前錫羨於後故嗣子以功驟遷金紫光祿
大夫歷太僕卿文安郡別駕轉殿大監幽州節度判
官上柱國位雄鄉月文頌國風佐理鄭南惠懷邑屋
通籌薊北磔裂儋林鬱此國楨獨耀鄉錦得非府君
善訓積慶之祐也以爲曠先構者匪仁揚美名者謂
孝況白華之悲罔極緇衣之頌未傳詹與殿監在幕
密交匪才見託俾颺先碣永示後賢詞曰

於赫我祖滎陽系先顯允烈考分族居燕才用駿發

心機鏡懸芥視小節雄成大賢

其一

大賢伊何以孝忘

仕忘仕伊何屢薦不起博考墳籍工言政理遘爾凶

徒玷我良士

其二

身擺偽祿口吟歸田獨與道者同栖

浩然閉門柳口虛室草玄遠從零露俄悲逝川

其三

立貞臣慶流賢子卿月高鑒堯天佐理政必移風清

逾飲水柴也泣血杖而後起

其四

怙恃合耐毀瘠偏傷

途搖白旒棺飾黃腸山門寂寂壠樹蒼蒼秉茲幽節

永播清芳

其五

石刻

陰庭誠

庭誠大厯中鄉貢明經攝燉煌州學博士

大唐隴西李府君修功德碑記

上飛閣□□霞連依□□居□出人境聖□時照一川

星懸□鐘

缺四字

雷□靈仙鬼物往往而在屬以賊臣

千□□寇

缺四字

地維暴殄天物東自隴坻舊陌走狐

兔之羣西盡陽關遺邑聚豺狼之窟□木夜警和門

畫局塔中委塵禪處生草時有住信士朝散大夫鄭

王府諮議隴西李太賓其先指樹命氏紫氣度流沙

之西刺山騰芳□名威懸泉之下時高射虎入望登

龍開國西涼稱藩東晉諮議卽興聖皇帝十三代孫

遠派天分世濟其美靈根地植代不乏賢六代祖寶

隨使持節侍中西陲諸軍事鎮西大將軍領護西戎
校尉開府儀同三司沙州牧燉煌公王門西封邑三
千戶曾祖達皇燉煌司馬其後因家焉祖操皇大黃
府車騎將軍考奉國皇昭武校尉甘州和平鎮將早
逢昌運得展雄材一命是凌雲之資百齡懷捧日之
慶垂條布穎業繼弓裘築室連閭里成冠蓋難兄令
弟卓然履道之賢翼子謀孫宛爾保家之主諮議天
授瘡粹神假正直交遊仰其信鄉黨稱其仁義泉深
沉酌而不竭道氣虛遠感而遂通嘗以爲挹江海者
難測其深淺望乾坤者不究其方圓況色空皆空性

相無相豈可以名言悟豈可以文字知夫然故方丈
小室默然入不二之妙智度大道法爾表無念之眞
以其虛谷勝聲洪鐘應物所以魔宮山圻佛曰天開
愛水朝清昏衢夜曉一音演法四眾隨緣直解髻珠
密傳心印凡依有相卽是所依若住無爲還成有住
由是巡山作禮厯險經行盤迴未周軒轅□斷刻削
有地締構無人遂千金貿工百堵興役奮鎚聳壑揭
石聒山素涅盤像一鋪如意輪菩薩不空罍索菩薩
各一鋪畫報恩天請問普賢菩薩文殊師利菩薩東
方藥師西方淨土千手千眼觀世音菩薩彌勒上生

下生如意輪不空罽索等變各一鋪賢劫千佛一千
軀初坏土塗旋布錯彩豁開石壁儼現金容本自不
生示生於千界今則無滅示滅于雙林考經尋源備
物象設梵王奔世佛母下天如意聖輪圓轉三有不
空妙索維持四生人其報恩天則請問六牙象寶搖
紫珮以棲眞五色獸王載青蓮而捧聖十二上願列
於淨刹十六觀門開其樂土大悲來儀於鷲嶺慈氏
降跡於龍華丕休哉千佛分身聚成沙界八部敷眾
重圍鐵山希夷無聲悉窅欲動爾其簷飛鴈翅砌盤
龍鱗雲霧生于戶牖雷霆走於階陛左豁平陸目極

遠山前流長河波映重閣風鳴道樹每韻苦空之聲
露滴禪池更澄清淨之趣時節度觀察處置使開府
儀同三司御史大夫蔡國公周公道治生知才膺命
世清明內照英華外敷氣邁風雲心懸日月文物居
執憲之重武威當杖鉞之雄括囊九流住持十信爰
因蒐練之暇以申禮敬之誠揭竿操矛闢戟以從蓬
頭胼胝傍車而趨熊羆啟行鴈鸞陪乘隱隱軫軫蕩
谷搖川而至於斯窟也層軒九空複道一帶前引簫
唱上干雲霓雖以身容身投跡無地而舉足□足登
天有階目窮二儀心出三界有若僧政沙門釋靈悟

法師卽諮議之愛弟也戒珠圓明心鏡朗徹學探萬
偈辯折千人出火宅於一乘破空遣相指化城於四
坐虛往實歸於是引兄大寶弟朝英姪子良子浚子
望子羽等拜手於堦下法師及姪僧志融斂袂於堂
上曰主君恤人求瘼戡難濟時并稅且均家財自給
是得旁開虛洞橫敞危樓將以翼大化將以福先烈
休庇一郡光昭六親況祖孫五枝圖素四殺堂構免
墜詒厥無慚非石何以表其貞非文何以紀其遠且
登高能賦古或無遺遇物斯銘今豈遐弃紛然遞進
來以求蒙蔡公乃指精廬而謂愚曰操斧伐柯取則

不遠屬詞比事固可當仁仰恭指歸俯就誠懇敢□

□其狂簡庶髣髴於眞宗□大厯十一年龍集景辰

□□□有十五日辛未建

西域水道記

第五琦

琦字禹珪以吏幹進官諸道鹽鐵鑄錢使進度支郎中兼御史中丞拜同平章事貶忠州長史起爲朗括饒湖四州刺史終太子賓客東都留守

常平倉奏

每州置常平倉及庫使自商量置本錢隨當處米物

時價賤則加價收糴貴則減價糴賣

唐會要八十八

請旌表竇升朝二女奏

軍天縣竇昇朝二女伯娘仲娘雖長於村野而幼有志操住與邠州接界草賊數千人持兵刃入其村落行剽劫聞二女有容色姊年十九妹年十六歲藏於巖窟間賊徒擬爲逼辱乃先曳伯娘出行數十步又曳仲娘出賊相顧自慰行臨谷伯娘曰我豈受賊污辱乃投身於谷賊方警駭仲娘又投於谷谷深數百尺姊尋卒仲娘脚折首破血流肢體氣絕良久而蘇賊義而去

冊府一百三十九

錢庭篠

庭篠大厯中官秘書省著作郎

唐故太中大夫太常寺丞兼江陵府倉曹張公

墓誌銘

并序

公諱銳字郊侯姓張氏清河人也派引南陽光連景
宿儀以縱橫爲秦相禹以經術作帝師盛烈茂勳代
有人矣曾祖志鄜州洛交縣令祖彥昇贈鄧州長史
父惛朝議大夫虢州長史公虢州之長子也生則秀
異幼而聰敏雅傳黃君之經深得臨池之妙未弱冠
入仕以門蔭宿衛解褐授右司禦率府兵曹至德中
充四鎮節度隨軍判官知支度事轉恆王府掾加朝

散大夫轉光祿丞賞有功也屬西蕃未靜國步猶虞
或從幸關東或隨軍幕下尋奉使宣傳聖旨陷沒賊
庭者久之公辯說縱橫摧謀應變陳之以禍福懼之
以威嚴既迴有詔特遷太中大夫蜀王府司馬嘉其
節也公以恭承虐略遠仗天威於我何功固辭不拜
前後三□方允乃授今任焉由是恩制授太夫人長
樂縣太君禮有崇也以板輿迎侍于江陵申祿養也
公幹於從事情有吏能勤勞自公出納惟愴且夫奉
使不屈忠也揚名立身孝也方期積慶用以成家天
道何常降年不永以寶應二年正月廿五日爰歿于

江陵府之官舍春秋廿有七以今大厯九年歲次甲寅三月四日癸卯寔於京兆之鳳栖原從太君之新塋也澹澹春雲垂陰陌樹冥冥厚夜獨閔幽泉嗟兩散以風搖空父臨而弟拜銘曰

後生可畏兮誰與爲徒張氏之子兮其庶幾乎苗而不秀有矣夫庭折芳蘭兮掌碎珠太君塋旁兮左愛子千秋萬歲兮魂不孤

石刻

盧元裕

元裕字子寬刑部侍郎劍南節度太原尹太子賓客
請重杖不致死奏

準式制勅與一頓杖者決四十重杖一頓者決六十
無文至死式內自有殺却處盡等文卽明重杖卽合
加數京城先因處分決殺者多一死不可復生望準
式文處分或決痛杖一頓者式文旣不載亦請準重
杖六十例不至死

冊府一
百十二

韓擇木

擇木昌黎人大厯中工部尙書厯右散騎常侍

相國帖跋

相國狄公元功盛德垂之萬代顏尙書家有其請太
子歸京師手奏七百餘字以示昌黎韓擇木爲書于

其後子孫寶之

張從申

從申吳郡人大厯中進士檢校禮部員外郎官至大理司直工書文弟從師從義從約稱張氏四龍

重刊季札墓碑記

夫子篆季子墓凡十字厯代縣遠其文殘缺人勞應命其石湮沒在昔開元中元宗勅王仲雍模搨其本尙可得而傳者暨大厯十四年己未歲潤州刺史蘭陵蕭定重刊于石憲章遺範以永將來吳郡張從申

記汗簡

卷七

李宥

宥大厯中人官藁城縣主簿

解慧寺三門樓讚

并序

後魏興和二年置寺名之靜觀大隨開皇十一載也
改創解慧爲文北近滹沱大川西負井陘巨鎮山勢
邐迤依依目前河流潺湲繚繞金剎寶殿昔立長廊舊
成門之不修梵宮未備□如意年中有高僧日寶弃
世從道秉心安禪悟眞如達無生白日雨天花爲香
清夜擁毒龍爲衛願修佛事隨喜興功大聖啟心羣
生響應乃親自仗錫詣乎山林尋喬松求巨石良工

庶木剡之爲棟山神指石石化爲柱旣人神乎勑力
乃何徃乎不濟然後雕朱粉鏤文彩基上爲門門上
爲樓三門之義其大矣哉是將化羣俗崇善因悲火
宅之將焚引凡愚於淨界雙林之地寶樓化域有千
般蕙草明媚於前列百丈喬林鬱盤於後清心一陟
如登刁利之天梵宇徧遊悉獲菩提善果頃北虜南
侵河朔驚震城郭宮室列火而焚父子兄弟揮刃而
死大帥樓上隕身而下臺髮無傷口誦佛頂神經刀
仗乃向身而斷壞心持救苦之念寶樓乃火不能燒
胡曉□羣啟顙而□北有鴈塔建乎齊朝香剎上凌

青雲發陟迥超三界爲蒼生大機令迷津自達彼岸
鎮滹沱巨水乃河龍不敢南侵此乃寶公前生所造
人傳聖跡悉有明徵寺內者德瑯海童子出家清心
入道爲梵宮之主繼前聖之心上坐崇俊□年披衣
□立大功建寶堂於常住精持般若開釋教於蒼生
同力禪宮俱成佛事維那法廣性明了智通惠爲僧
衆之領袖秉伽藍之紀綱合寺僧徒悉皆清淨少長
有禮威儀不忒持鉢同歸想祇園而目覩洗足圓坐
如釋迦乎斯在□一尉於此□簿於是向五□焉春
秋廿有四也性狂簡非佛法忽經戒傲三寶出入以

漁獵爲樂饍食以酒肉爲味□逸其性三塗業成有
大法師曰珠言余之義兄也身長七尺江目海口心
明玉鏡色淨蓮花演大乘經救蒼生於此邑至四月
初結夏茲寺招余往來初言禍福之門再指吉凶之道
愍我如是令歸善因余知昔非稽首從命謂余曰聖
跡如是大功無紀千歲之末誰人共傳子其誌之請
不辭也敢不承命書詞後焉詞曰

大師寶公能安禪至今日乎一百年過門樓乎金剎
前念救苦兮賊不害力禪通兮火不然成大功而百
三天故有爲以入無爲結有緣乎福無邊大歷十二

年六月六日記
常山貞石志

唐文拾遺卷之二十三

榮祿大夫三品頂戴前分巡廣東高廉道加四級臣陸心源輯

康仲熊

仲熊大厯中人

陪遂安封明府游靈巖瀑布記

縣之西有山山之巘有泉勝可知也薄游于茲懿彼
幽絕不俟終日褰裳造焉遂負綠綺岸烏紗屨及於
城隅杖及於通衢背山郭之縈紆乍緩步以趨縣君
封公聞而喜曰興所引也我得無行乎乃命車騎邀
嘉客追我於楓香之野乘我以驪眉之馬載笑載言

遺谷超原於是穿窳窈躡嶇嶇綠雲搏壁極乎所聞
觀其陽崖劃開陰壑旁轉懸水百仞注而成潭萬象
奔走以呈形羣峰回合而却倚練影挂於層漢雨聲
散於長林潺潺然無晝夜而息雖天台之飛流蔑以
過也吾徒盥於斯鑑於斯塵心洗然世慮都遣啜香
茗以傲睨招清風而詠歌足以長道機滌煩想功名
軒冕於我爲賓矧夫上隱雲天下臨佛土巖岫窅藹
時人穿窺禪菴居解虎之僧洞堀棲驂鸞之客永言
長往其可乎哉封公曰異乎夫子之說方今國步未
安兵革多故忠臣佐世之曰志士膏膽之秋遽欲退

閑恐非通論僕曰唯唯幸無重吾過請從子而歸回
首林蘿謝白雲而去刻彼巖石聊紀盛游時大厯十
二年暮春上巳之明日也

嚴陵集

韋光輔

光輔代宗朝太府少卿

改造銅斗尺秤奏

今以上黨羊頭山黍依漢書律厯志較兩市時用斗
每斗小較八合三勺七撮今所用秤每斤小較一兩
八銖一分六黍今請改造銅斗斛尺秤等行用

唐會要六

六十

韋纘

全唐文卷四百有傳

大唐華州下邽縣丞京兆韋公夫人墓誌銘

序并

維唐大厯十三年三月廿五日韋公夫人遘疾終于
長安親仁里之私第夏四月口遷殯萬年縣加川鄉
西原時無良禮不備故也貞元庚午歲二月廿三卜
叶禮具返葬洪固鄉韋之舊壙祔皇姑也享年卅九
孝子之感倍焉夫人姓王氏其先太原晉陽人也九
代祖亮後魏比部尙書西河郡公尙書令中山郡王
勣之弟也曾祖眞行有唐汝州葉縣令口恒怡河南

尹東都留守初爲御史正憚姦息父毗京兆府奉先
縣丞夫人少喪怙恃終鮮昆弟年十七歸于下邳公
公五代祖孝寬周爲大司空隋爲雍州牧其後登三
台列入座焜煌國史此不具舉夫人惠和懿柔稟之
自然故韋□門大族茂能卑以自約祗上接下而人
無閒言事姑惟勤□天以敬踰廿載婦道睦如也□
子均育免懷就傅親賢慙□母儀溫如也華靡不改
欲榮耀不汨志安買臣之尙貧知□□之未遇敬孟
齊□梁鴻比德君子謂之無媿辭宜乎鍾壽畀□□
何先露早世時□彼蒼仁者之惑嗚呼哀哉有子五

人曰纘曰潔曰系曰綰曰紆免三年之喪茹終身之痛恭守儉薄爰卜安兆封樹將立日月有時攀塗車而莫及輒泉扃以凶極恩盡直泉悲長霜露是用祇述景行式楊幽窆銘曰

行備德充反殲其躬哀子泣盡良人室空倅殯還鄉魂安孝終口櫝有折慕思無窮

石刻

張延賞

全唐文四百三十二有傳

請減官收俸料資西討奏

爲政之本必先命官舊制官員繁而且費州縣殘破

職此之由臣在荆南劔南當管州縣闕官員者或數
十年吏部未嘗補授但令一官假攝公事亦理以此
言之官員可減无可礙也今請減天下官員收其祿
俸重募戰士從立佐收復河湟軍用不匱乏矣册府
九百

陸羽

全唐文四百三十三有傳

顧渚山記

豫章王子尚訪曇濟道人于八公山道人設茗子尚
味之云此甘露也何言茶名也吳興藝
文補

韓滉

全唐文四百三十四有傳

同中書門下加俸奏

准今年四月二十八日恩勅加給京文武官九品已上正員官月俸其同中書門下平章事不帶正官勅內無額應檢校同中書門下平章事並請同正官例就一高處給

唐會要九十一

崔造

全唐文四百三十四有傳

進狀先本司奏

亡官失職婚田兩競追理財物等并合先本司本司
不理然後省司省司不理然後三司三司不理然後
合報投匭進狀如進狀人未經三處理及事非冤屈
輒妄來進狀者不在進限如有急切須上聞不在此
限其妄進狀者臣今後請并狀牒送本司及臺府處

理

唐會要
五十五

李季平

季平隴西人

唐故金紫光祿大夫試太子詹事兼晉州刺史

上柱國隴西郡開國公李公墓誌銘

并序

山有發地崛起者謂之靈岳木有梢雲挺擢者謂之
長材然木之秀也遇驚風或折山之峻也有朽壤則
崩噫以人事擬其倫我李公近之矣公諱良金隴西
人也五代祖儉佐高皇帝定都於雍因居幽郊子孫
不遷遂傳於新平矣皇祖素謚州眞寧宰大父亨絳

州長祚府折衝烈考宗益州新繁令或墨綬馳聲或
鵬冠陳力皆樹德積善而鍾美於公公卽新繁府君
之次子也幼而銳敏長而英奇氣鬱風雲心堅鐵石
弱冠忽投筆太息杖劍獨遊時朔方節度副使論公
遇公而寘之幕下口後出奇破敵戡難計功世年間
累有遷拜日者受分符之寄於晉也人樂其化吏畏
其威雖迫兇徒而身處唐郊亦懷王命而心馳魏闕
間歲職營田之務於蒲也規畫疆理巡閱耕耘法立
令行人莫敢犯豈意訟因小吏詞忤大臣蒼黃之際
命歸不測傷哉以大厯三年七月十一日奄終於河

中府春秋卅有七夫人滎陽鄭氏芳蘭之姿堅冰之
操中年不幸先公而亡以廣德元年十一月十四日
返口於晉州官舍享年卅有一旋以公卽世之歲十
一月廿六日合葬於晉城東徧龜筮叶從也嗣子季
平弱而在疚哀不絕聲長號終天願言報德銘曰

長材國楨雅望人傑植性剛毅守官忠烈

闕

心苦節

汾晉作牧吏畏人悅如何生涯忽焉寘

闕

秀木折繁

霜凝兮芳蘭歇千秋兮萬

闕

雙魂兮同穴

續詩堂
碑錄

王延昌

全唐文四百三十五有傳

大唐興唐寺淨善和尚塔銘

和尚姓張氏法號淨善京兆雲陽人也幼而神清長益靈悟誠請旣深緣愛自淨廼授經於惠雲溯源窮委靡弗徹貫以故業行高超利益弘溥知與不知宣示咸得解脫朗悟信大道之津梁也以乾元元年二月六日告行於興唐寺門人惠信等與俗侶白衣會葬近千人焉以其年九月九日起塔於畢原高岡式昭大口庶慰永懷銘曰

佛有妙法使皆清淨世界罕聞口然莫正大哉我師降厥慈悲開示寂樂破其惑迷法相旣圓色空自離

千萬大累歎泣而隨功成身去自契自藏銘於塔石

與天同長

石刻

鮑防

全唐文四百三十七有傳

停罷咸陽縣令賈全奏

准廣德二年敕中書門下及兩省官五品已上尚書省四品已上諸司正員三品已上官諸王駙馬等周親已上親及女婿外甥等自今已後不得任京兆府判司及畿縣令兩京縣丞簿尉等者今咸陽縣令賈全是臣親外甥恐須停罷

唐會要六十九

徐承嗣

全唐文四百三十八有傳

日蝕退分請編史冊奏

歷數合蝕八分今退蝕三分計減強半準占君盛明
則陰匿而潛退請宣示朝廷編諸史冊

唐會要
四十二

盧邁

全唐文四百三十八有傳

京兆河南兩府不勾縣案奏

伏詳比部所勾諸州不更勾諸縣唯京兆府河南府
既勾府並勾縣伏以縣司文案既已申府府縣並勾

事恐重煩京兆府河南府請同諸州不勾縣案

唐會要五

九十

徐浩

全唐文四百四十有傳

謝賜書表

臣言伏奉詔書賜臣漢故南陽郡太守鄧恢素書一
十五行奇跡遠至臣孤見寡聞所未遇臣當臨做冀
日進益不任欣戴謹奉表以聞臣誠惶誠恐頓首死

罪

寶真齋
法書贊

于頔

全唐文四百四十三有傳

別置推事文例奏

諸處推事不盡須重勘覆或有誣告等每失程期稽滯既多冤濫難息諸司及諸館驛多以大理爲閑司文牒遞報頗至稽滯失望今後各令別置文例切約所由稍涉稽遲許本寺差官累路勘覆如所稽遲處分州縣本判官請書下考諸司使本推官奪一季俸

料

唐會要
六十六

祀武成王議

國家攬理經恢弘祀典法施于人則祀之故追尊仲

凡爲文宣王貴德也以勞定國則祀之故追尊齊太
公爲武成王崇有功也臣伏以文宣王禮樂刑政之
紀爲君臣父子之節措置皇極化成人文齊日月之
耿光合天地之明德其於禮物宜其優崇而武成王
翼康匡周拯人靖亂功表東海道光一時推爲武宗
誠謂不朽請依李紓奏爲之焉

大唐郊
祀錄十

盧杞

杞字子良相德宗陰害矯謫李懷光反暴杞罪惡帝
始寤貶新州司馬徙澧州別駕死按與全唐文四百

四十五廬杞別

置監考使奏

六典云中書舍人給事中充監中外考使重其事也
今者有知考使無監考使既闕相臨難令詳揀請依

舊置監使

唐會要五十五

黎幹

全唐文四百四十六有傳

李勉勾當京城諸街奏

京城諸街種植大厯二年五月勅諸坊市街曲有侵
街打牆接簷造舍等先處分一切不許並令毀拆宜

委李勉常加勾當如有犯者科違勅罪兼須重罰其
種樹栽植如聞並已滋茂亦委李勉勾當處置不得
使有斫伐致令死損並諸橋道亦須勾當

唐會要
八十六

董晉

全唐文四百四十六有傳

昭德王皇后祔廟奏

伏惟古禮合用今年七月卒哭祔廟國朝故事高祖
六月而葬睿宗十月而葬並葬訖便卒哭祔廟聖朝
典故伏請遵仍令所司於今月十八日已前擇卒哭
位哭訖以十八日祔廟

唐會要
卷三

公主出嫁行冊禮奏

今月十日新都長公主出嫁行五禮準舊例並合前
一日於光順門行五禮今奉勅其日早於光順門便
行冊禮遂爲故事

唐會要卷六

冊公主典故奏

今月八日正衙冊新都長公主準開元禮其日皇帝
御正衙命使行冊禮陳樂懸伏準貞元二年五月冊
嘉誠公主二年二月冊長林公主皇帝並不御正殿
亦不設樂懸遂爲典故

唐會要卷六

王紹

全唐文四百四十六有傳

權設幕屋爲獻懿二祖行廟奏

奉遷獻祖懿祖神主祔于德明興聖廟爲修廟未成
今月十五日內移獻祖主於德明興聖廟中一處安
置九室數已定請於德明興聖廟東北量地之宜權
設幕屋爲行廟奉安神主俟新廟成準禮遷祔神主
入新廟每至禘祫年各於本室行享禮

唐會要
卷十四

陳設四室權安神主奏

請於德明興聖廟添造兩室奉安神主今緣就舊廟
增修則德明興聖廟殿南垣內陳設四室權安神主

庶爲宜稱

同上

王涯

全唐文四百四十八有傳

均攤南鄭欠稅奏

興元府南鄭兩稅錢額素高每年徵科例多懸欠今請於管內四州均攤代納二千五百貫文配蓬州七百五十貫集州七百五十貫通州五百貫巴州五百

貫

唐會要八十四

桑叔文

叔文貞元時左衛率府騎曹參軍

唐故淮南節度討擊副使光祿大夫試殿中監
兼泗州長史上柱國北平縣開國伯田府君

墓誌銘 并序

公諱仇京兆府涇陽人也鍾鼎之族被于前史高祖
宏皇光祿大夫靈龔等州刺史祖崇朝散大夫恒王
府司馬父仁俊朝議大夫朔州刺史並公望驟歸德
映臺閣冰壺表節水鏡居心公惟岳降神妙年獨秀
才高捧日詞美朝天懷百勝之謀有七擒之略故淮
南節度使工部尚書潁川陳公特達見許殊禮相遇
屈公入幕補節度討擊副使累奏光祿大夫試殿中

監兼泗州長史上柱國北平縣開國伯且楚有子玉
文公爲之側席漢有汲黯當朝爲之正色若非功高
衛霍名比關張孰能有此榮貴方將匡讚台階剋隆
元老何期智士石折賢人星殞積善無徵奄然辭位
貞元三年七月七日告終于江都縣贊賢坊之私第
春秋五十有一未得歸其枌榆且欲卜其宅兆卽以
其年八月四日歸葬于江都縣山光寺南原之塋禮
也公孝德純深風表牆仞舒卷風雲之際從容淮海
之間挺生不群保此全德一朝休息平生已矣豪梁
之上無復魚臺仲蔚之園空餘榛棘嗚呼哀哉乃爲

銘曰

森然秀氣鬱爾嘉醞彎弧月滿長劒星流肅肅轅門
稜稜霜氣日耀金戈雲連鐵騎南陽菊散西鄂芝沉
摧殘壯志埋沒雄心琴覆弦寬書埋簡落平陵松樹
潁川石墀曠野蕭條悲風寂寞石刻

李說

說官河東節度北都留守太原尹

進甘露表

臣說言臣所部太原府交城縣石壁山寺今月二十
二日夜甘露降于寺內戒壇西及寺外栢林上大枝

小葉無不周偏凝泣垂滴甘甜如蜜當寺臨壇大德
僧慎微與僧惠廣等一十五人咸共觀嘗覆問如狀
貞元十二年九月二十五日

顧氏金石
文字記

裴同亮

同亮京兆人進士

唐故清河郡夫人張氏墓誌銘

并序

貞元十五年十一月十二日夫人張氏奄終兮長安
縣懷德里之私第夫人張氏府君賈秀曾孫游擊利
休之愛夫人宿丞令族天與其惠柔儀雪映志行松
操至於織紉蠶餽奠祀之禮厚情周物絲竹通妙皆

稟生知出爲時則洎玉笋耀首至德全成求之美地
嬪于張氏秦晉有正鳳凰其儀鏡鸞無而雙影臨栢
舟泛而中河嬪爾乃服其澆濯鼓其琴瑟內闌外恭
安親惠下宿窕之容有節螽斯之慶大耋黔婁之妻
從夫孟軻之母訓于方俟同年也嗚呼積善無徵疾
也有作山林倖色泉路何迷夫人春秋六十有己貞
元十六年葬于□□□兒女四人孤幼鴈行泣血白
鳥祥至風樹不偯神道昭感天之明察海珍撫視摧
慟惜冀笑之早落興言異室羌桂月之先扼哀悼痛
傷骨肉持封石字永同天地之長海變桑田還識茶

墓誌銘

堂堂府君后族之良灼灼夫人宗室之光正若秦晉
睦若潘陽琴瑟培培鳳凰鏘鏘宜爾偕老萬壽無疆
如何昊穹今也則亡重泉幽壤無見日荒壘白揚生

蕭飄石刻

史恒

恒貞元初邠州三水縣令

大唐故扶風郡夫人馮氏墓誌銘

并序

夫人門傳高族鍾鼎承家既笄之年配于君子卽故
通議大夫行內侍省內侍員外置同正員太原王公

庭瓌之夫人也公則厲節立身忠以奉主出承王命
入侍禁闈累秩成勞頻遷祿位何期不壽逝我良臣
以興元元年薨於私第夫人孀居苦節備禮從家婉
順執心三隨婦道常依釋衆齋戒有時早悟空緣脩
持真諦奈何積善無徵德昭禍及昔掩空堂梧桐半
折今歸厚夜琴瑟兩亡嗚呼哀哉又足悲也貞元八
年歲集壬申九月廿八日終於京大寧里之私第春
秋五十有六卽以其年冬十月廿七日合祔於長安
縣龍首原送終禮也嗣子德進次子德逸次子德遜
晏等孤女嬀于劉氏並號絕擗地毀骨傷神痛割於

心昊天何極恐陵谷海變託石銘云

太原王公厲節奉忠不圖早世禍降先薨郡君夫人
四德能恭生之秦晉死之穴同石刻

楊自政

自政貞元初大理評事

大唐南陽張公故太原郡太夫人王氏墓誌銘

并序

夫人先寰之太原曾祖文武不墜才藝餘美隱跡邱
園父處泰之二女也夫人四德備身內和外睦敬上
撫下愛之六姻一念真如脩持衆行三歸淨戒滅即

示生奈何積善無徵有染來疾日月已累厚夜長辭
貞元八年二月廿九日終於京長安縣義甯里之私
第春秋七十有五卽以三月廿二日葬于城西龍首
原禮也嗣子奉天定難功臣雲麾將軍守左金吾衛
大將軍兼試太常卿上柱國開國伯右神策軍副將
專知苑內都巡察孤女笄于高氏並號叫擗地氣絕
無聲以託斯文刻之銘記詞曰

張公之室大原郡君名家遠族非晉卽秦前之與後
永閉雙春白揚悲風傷之見人

續語堂
碑錄

田益

益貞元中人

唐故泗州長史試殿中監京兆田府君墓誌銘

并序

府君諱仇京兆涇陽人也曾祖宏唐故光祿大夫驃騎大將軍靈冀等州刺史祖崇朝散大夫恒王府司馬父仁俊朝議大夫祥州刺史之次子也公豁達英才氣雄志勇少參戎武累著勲業至如攻必取戰必勝安危定難只在談笑則公之德敷世不絕賢尋拜泗州長史試殿中監又歷諸府幕權揔臧司則翰墨不能縷載夫人清河冀氏淮南節度押衙開府儀同

三司檢校太子賓客景城郡王奕之長女也皆軒冕
盛族令德備聞輔佐君子實謂秦晉耳公久主強兵
屢清淮海功高望重日冀遷榮所謂公祿及二千石
壽逾百歲奈何上天不仁屈公以短曆哀哉貞元三
年七月七日寢疾歿于揚州江都縣贊賢坊之私第
也享年五十其時道路艱阻未獲還鄉權卜葬于揚
州江都縣臨灣坊之原也積善無慶夫人小因沉痾
於貞元十一年六月廿五日又終舊室嗚呼漂然寄
家親故乖遠數歲之內淪謝相望夫人作腹不孕府
又無別息以姪孫益繼副其後益罄其餘產奉舉大

事以其年八月廿七日合祔於府君舊塋禮也慮恐
歲月遷邁陵谷變移所銘貞石期於不朽辭曰

功成業就兮身之云亡事不可問兮悠悠彼蒼駿馬
錦衣兮淪形滅影寶劍金甲兮沉氣銷光孤墳峨峨
兮倚雲臨水新栢蕭蕭滴露凝霜親友哭送兮從茲
一別永無返期兮泉路何長

石刻

任要

要官都督充州諸軍事

岱嶽觀題名

貞元十四年正月十一日立春祭嶽遂登太平頂宿

其年十二月廿一日立春再來致祭茶宴于茲

顧氏金石

文字

趙傳說

傳說建中時人

資陽縣法雨寺北巖釋迦牟尼佛龕頌

并序

龕者以文字之義則合加於龍龍之德大矣哉上古以之伏藏焉所謂石室也後代勒之以佛像傳寶迹於遠也□□窮於□劫剛石偏於沙界用包大空□入羣有光明□□清淨龍飛善救

缺四字

慈愍然龕者

乃此居士姓左名巖字太素其先出於齊國五代祖

因□派流今爲資中人也爰宅我居惟桑與梓幼而
貞敏長而能賢家室諧和孝友恭儉五十餘年人莫
知也故能靖迴脩習體魄精凝不□□□寶生□室
滅全缺四字膏所留處而俗化不規缺四字是片□奇匠
歌靈岑鎚未及缺四字作鑿不見鋒火卽□焰□□□
之□而□之寶貝□□於絕壁缺四字於峭嶠螺髻雲
結額缺五字北峯比崇目將南江長注現輪王之□好
觀諸虛空而此身缺四字世界而彼佛□來徒以寒暑
之不居閱□窮之久代以天地之長久悲永劫之因
緣乃爲頌曰

離靈峯兮亘□□湛明鏡兮大龍□□□賓□兮日
月輝若有人兮知四諦觀佛性兮□□際見光□兮
千□□_{金石苑}

侯銘

銘德宗朝人

大唐故昭武校尉守左驍衛將軍上柱國陳公

墓版序文 _{并序}

公諱義字興厥初以大舜之稟侯于陳而氏焉敬仲
已還不常其所今又爲河東人也王父克同列考福
皆讀叔夜養生之論慕蔣詡斂迹之風淳素自高疎

于榮祿公屬天寶季祀羯胡干紀激仁爲勇移孝作忠徇定遠之從義期征虜以効節頃之官至左驍衛將軍策上柱國累有功也尋入居環衛載睦親朋方趣無生以得真先依有相而弘法割田園之產罄俸祿之資齋筵列於皇州僧徒畢至香翰寫於玄籍唐本無遺允矣知身是幻而況於財不亦達乎將福庶類而況祖考不亦仁乎春秋七十有二願終邁疾永貞元年十月六日卒于上都金城里之私第於戲嗣子叔寧年齒尙幼夫人河南王氏夙有淑德嚴于壺範公之善功皆夫人佐成逮今茹荼飲泣庀于阼事

以其年冬十二月二十有五日庚申葬于長安縣龍首原禮也銘曰

尙忠好仁載經籍公實兼之成懿績作善精魂當有適順時松檟斯冪冪石刻

樊晃

晃德宗朝潤州刺史歷度支兵部員外湖陽人

杜工部小集序

工部員外郎杜甫字子美膳部員外郎審言之孫至德初拜左拾遺直諫忤旨左轉薄遊隴蜀殆十年矣黃門侍郎嚴武總戎全蜀君爲幕賓白首爲郎待之

客禮屬契濶湮阨東歸江陵緣湘沅而不返痛矣夫
文集六十卷行于江漢之南常蓄東游之志竟不就
屬時方用武斯文將墜故不爲東人之所知江左詞
人所傳誦者皆君之戲題劇論耳曾不知君有大雅
之作當今一人而已今採其遺文凡二百九十篇各
以志類分爲六卷且行於江左君有宗文宗武近知
所在漂寓江陵冀求其正集續當論次云

杜工部集

李藩

藩字叔翰少沈靖敏于學杜亞守東都表致府中張
建封辟節度府官建封卒詔追入釋拜秘書郎擢吏

部郎中拜門下侍郎同平章事出爲華州刺史未行卒贈戶部尚書諡貞簡

趙郡李氏殤女墓石記

殤女李氏趙郡高邑人也小字孫二年十六貞元十七年十一月廿二日遘疾終於長安永寧里之旅舍以十二月三日窆於萬年縣高平鄉西焦村之南原從權禮也曾祖父諱畬皇國子司業贈太子賓客祖諱承皇正議大夫檢校工部尚書兼潭州刺史贈吏部尚書諡曰懿子歷淮西道淮南道黜陟使河中道山南東道湖南道節度觀察都防禦都團練等使父

藩秘書省秘書郎殤卽藩之第三女也念爾稟天之
和而聰明孝友得禮之節而恭敬廉讓奉上順下動
無所違吾身苦病爾之疾畏吾之知吾家苦貧爾之
欲亦畏吾之知淳性感人逮此增痛痛莫及矣哀如
之何唯俟於吉時歸葬于故國祔我先塋之松栢從
爾孝思而已矣銜涕書此用安幽魂魂而有知鑒我
誠意貞元十七年十二月三日秘書省秘書郎李藩

記石

宋并

并興元中人

魏博將校勒功銘

唐興元元年歲在甲子冬十有二月戊辰朔賊臣李
希烈據江漢之陽跨淮汴之右竊□神器陰包禍謀
爲蛇爲豕薦食郊□難雜中夏禍□□服帝命東□
□□伐叛時永平鼓行而衝其前昭義悉甲而倚其
左平盧張翼而角其右我尙書田公以北鄙多虞專
征楚□乃遣節度押衙後率兵馬使□符恍爲行營
統軍以精卒萬騎仗律以躡其後以其月七日甲戌
次于孟津遂屯于大伾之下漢營□岸而月□虜帳
連山而星列乃維舟爲梁截流□度數日之後方□

□濟銳氣□集雲合九天雄俊傍□霜肅萬里□□
元惡莽行□□爰刊茲山□□厥事刻石

楊暄

暄貞元中宏農人按黃本驥謂卽天寶宰相國忠猶
子非

大唐故清河張夫人墓誌銘并序

夫人號威德清河之族積善承家祖考諱延昌二女
□不乏廿賢園林隱跡夫人旣拜之後適于閭氏婉
順和睦克柔母儀淑慎於家聲聞於里況乎先覺早
悟色空齋戒在心持念閑目奈何善不增壽命也自

來染疾月旬歲過不減貞元八年二月廿日終於京
長安縣義寧里之私第春秋六十有九卽以其年五
月十八日擇兆吉辰葬於長安城西龍首原之禮也
嗣子庭萼右龍武軍宿衛忠孝之道號絕過禮次子
庭珍右羽林軍宿衛邠州節度使尙書張獻甫奏赴
行營遂忠於國孝不並行報哀之情昊天何極嗚呼
痛哉又足悲也一女四德嬈于白氏半子之分禮以
恭仁攀慕痛深將刻斯石其銘曰

清河夫人嬈于閻氏二男一女忠孝誰理其公之獨
守痛絕靈机四時定省賴之半子其楚挽送終染疾

一周死生命也念之何求其三孤墳寂寂松柏颼颼泉

門永掩萬古千秋

其四

古誌
石華